

ex tribus Collegii partium summam conficiebant , ambigendi locus non relinquebatur , quin , si ad adorationem ventum esset , Severinas Pontifex crearetur . Verum dum , sacris peractis , a senioribus initium fit , Ascanius Columna , Severinatis hostis , qui , ne patruo pontificatum petenti officeret , palam se ab aliis sejungere noluerat , fore ut aliquis prior referret pedem arbitratus , cum eo jam res redigeretur , ut haud dubie Severinas Pontifex fieret , repente altiori voce enuntians , Divino se impulsus Spiritu ei suffragari non posse ; momento , reliquis contra nitentibus , sacello egressus , septemdecim se adjungit . Cunctorum ob id perturbatis animis , comitia tamen minime intermittuntur : ex quatuor ac triginta , viginti octo suffragia Severinas tulit ; quibus cum duo accessissent , statim creatum esse Pontificem pronuntiant . Nec deerant , qui illico sterni fores , atque in divi Petri basilica de more sistendum atque adorandum censerent ; ac , ni pauci , quibus commune bonum cordi erat , obstitissent , moderatisque consiliis fervidos animi impetus comprimere ac sedare adnixi fuissent , vehemens , neque facile extinguendum incendium exortum foret . Verum licet a promulgando Severinate abstinuissent , legitime tamen creatum ajebant . Idem ipse confirmabat : obtestabatur ; decem atque octo , qui in suffragia non iverant , reliquos impedire nequivisse , quin æris campani pulsu de more ad comitia accederent ; unicuique liberum atque integrum esse , ut electioni intersit ; si qui privato affectu adesse nolint , dum sacrosanctæ leges servantur , aliorum auctoritatem infringere , aut labefactare non posse . Hæc palam a Severinate ejusque sectatoribus dicebantur ; qui jurisconsultorum , rituum , cæremoniarumque Pontificum libros deposcunt , ut , quid jure decernatur , inspiciant . Contra alii , non privata ratione secessisse ajebant , sed quod (integra religione) studia , ambitum , artes adhibitæ ferre non possent ; suffragia minime libera ; cuncta pollicitis minisque referta ; in Severinatem binas collegii partes non consensisse ; qui minori suffragiorum numero se Pontificem appellet , ejusdem fautores , sectatoresque sacris Conciliis , Summorum Pontificum decretis fidelium communione amoveri . Severinas vero posthac , absque jurium suorum detrimento , comitia habenda dicere .